

遇

恩

錄

一統

肇基

錄

震澤

紀聞

復

身

錄

革除

遺事

節本

革除

逸史

關

錄



革除遺事節本

黃佐撰

中華書局

革除遺事序引

革除遺事何以錄懼漣也。諸先正之死。嗚乎烈矣。大節揭揭與天日相爲昭。何漣乎懼。懼史之逸之也。逸之矣。此其錄之也。何承二聖帝意也。太宗文皇帝嘗論諸先正之死曰。彼食其祿。自盡其心爾。仁宗昭皇帝又曰。若方孝孺輩。皆忠臣也。肆大笞。俾爾宗爾姻姪從輕典。且俾田爾畋宅爾宅。毋滯。嗚呼仁哉。謂之曰忠臣。非有傳則何以示勸。故茲錄之。凡以承二聖帝之意也。疑以斬信。信以斬微。信則不疑。微則益信。是編也。本莆田宋公端儀革除錄。并收張芹林塾二家。然猶有缺焉。疑其所旣徵。白其所未瑩。則有缺乎。後獻君子。

四庫全書提要

革除遺事節本六卷。明黃佐撰。佐有泰泉鄉禮已著錄。是書有列傳無本紀。明史藝文志載黃佐革除遺事六卷。當卽此書。然佐書實有本紀。其所自撰序可考。又郁袁革朝遺忠錄別載佐序。稱舊本繁文。今皆芟之。定爲七卷。是知十六卷之革除遺事。乃佐之全書。此則佐所自節之本。通本紀爲七卷。此本佚其本紀。故止有列傳六卷也。又原書如姚廣孝諸人。皆別爲外傳。此則不復分析。其體例亦稍不同。

革除遺事節本卷一

明 黃 佐 撰

革除君紀

革除之禍。創肇自君。海水載蜚。甲觀乃焚。赫赫有命。歸我聖文。稽獻齒簡。芟紀糾紛。

述君紀第一

建文君

建文君諱允炆。懿文皇太子長子也。洪武壬申。懿文薨。時太祖皇帝春秋高矣。御東角門。日與羣臣相向泣。翰林學士劉三吾進曰。皇嫡長孫。既富子年。宜蚤正位。以繫天下之望。上命有司擇日行禮。九月十三日。立爲皇太孫。詔曰。曩古列聖相繼。馭宇內者。首立儲君。朕自甲辰立王位。戊申卽帝位。於今二十九年矣。前者操將練兵。平天下亂。偃天下兵。奠生民於田里。用心多矣。統一以來。除姦暴。去豪強。亦用心多矣。邇來蒼顏皓首。儲嗣爲重。嫡孫允炆。以九月十三日冊爲皇太孫。奉上下神祇。以安民庶。詔示臣民。想宜知悉。二十九年丙子八月。詔廷臣重議諸王見東宮禮。禮官議曰。諸王來朝。冕服見天子畢。次見東宮。已。有議定儀。其敍家人禮。王及東宮俱常服。引禮官請王由東華殿東門入。至後殿。王西向坐。東宮東向。贊禮官贊四拜。王坐受相見禮畢。敍坐則東宮正中南向。諸王列于東西。奏上從之時。諸王皆東宮叔父故。

也。然皇太孫幼冲。自是諸王多不心服。三十一年戊寅閏五月。太祖皇帝崩。十六日。宣遺詔。皇太孫卽皇帝位。詔改明年爲建文元年。詔赦天下。追尊懿文皇太子爲孝康皇帝。廟號興宗。懿敬皇太子妃常氏爲孝康皇后。尊母皇太子妃呂氏爲皇太后。葬太祖高皇帝于孝陵。授遺詔。止諸王會葬。立皇太孫妃馬氏爲皇后。長子文奎爲皇太子。封皇弟允熲、允煙、允熙、皆爲王。六月。以戶部主事夏原吉爲戶部右侍郎。中書舍人蹇義爲吏部右侍郎。召前河南右叅議董倫爲禮部侍郎。兼翰林學士。漢中府教授方孝孺爲翰林侍講。詔行寬政。赦有罪。蠲逋租。魏國公徐輝祖、曹國公李景隆等。進秩有差。詔修太祖高皇帝實錄。召王景彰爲翰林侍講。預修纂。而文學之士楊士奇等皆與焉。以戴元禮爲太醫院使。八月。以陳迪爲禮部尙書。九月。長星西殞。有聲如雷。征虜將軍西平侯沐春卒。春。黔寧昭靖王英之子也。鎮雲南七年。累征蠻獍有功。總四川雲南貴州兵。欲盡平其地。未及而卒。遣祭命官護喪至京。復遣祭者再賜諡曰惠襄。十一月。征南將軍總兵官顧成、副總兵宋晟、韓觀、平五開叛寇。師還。駐常德。遣錦衣指揮談全諭班師。是歲加兵親藩之不靖者。洪武三十二年。即奉除建文元年春正月庚寅。大祀天地。還宮。御正殿。受羣臣賀。詔養老。賜高年米肉絮帛。命官贖民之鬻子。減民田租。遣使者問民疾苦。駙馬都尉郭鎮卒。鎮武定侯英之子也。尙永嘉太長公主。時奉命賞遼東兵。途中得疾。至京師卒。斂及葬皆遣官賜祭。命右軍都督僉事宋晟至甘肅。二月。幸太學。祀先師孔子。詔求賢。以張曷爲北平布政司左布政使。時周濟湘代岷五府。相繼煽動。故遣曷鎮燕。詔戶部右侍郎夏原吉等二十四人充採訪使。分巡直隸十四省。原吉巡撫福建。所過郡邑。明公

寬大人咸悅服。邑庠生楊子榮一見器之。期冠秋試。已而果然。子榮後名榮爲名臣。世稱原吉知人。原吉尋奉命出鎮蘄州。貶監察御史尹昌隆爲福寧知縣。四月十三日。湘王伯薨。擢給事中徐思勉爲山東按察司僉事。以管充採訪使。有勞故也。七月。靖難師起。北平左布政使張昺。都指揮謝貴被執。昺死之。先是諸藩不靖。周王被竄。湘王聞討。自焚薨。執齊王至京邸。留之。徙代王于大同。岷王于雲南。時文廟在燕邸。亦被詔讓。是月五日。北平布政司吏李友直。以布政使張昺之情告。六月。執昺等。隨攻奪九門。移檄言姦臣齊泰等變亂祖宗成法。調兵殺害親王。於是車駕奉天征討。而擢友直爲本司右參議使。拘收糧米于楊柳青諸處。且督大興宛平二縣人夫。浚齊化司諸門城壕。三司官之交構者。旣就擒。凡三日。城內外悉定。王遂遣將張玉朱能等。引兵首攻薊州。擒都指揮馬宜殺之。指揮毛某等降。遂取遵化。永平密雲。駐于灤河。上遣曹國公李景隆爲征虜大將軍。駙馬都尉李堅爲左副將軍。都督甯忠爲右副將軍。以抗禦之。贈故翰林待制王禕爲翰林院學士。諡文節。八月。靖難師克雄縣。執都督楊松潘忠等。乘勝攻眞定。長興。侯耿炳文帥兵二十萬。與戰敗死。李堅甯忠等俱被執。旣而安陸侯吳傑軍亦敗。九月。江陰侯吳高以遼東兵攻圍永平。靖難師敗之。高遂棄輜重遁。十月。遂定大寧。都指揮朱鑑死之。都指揮房寬降。李景隆攻北平城。十一月。及王戰于鄭村壩。大敗。會城中亦出兵來擊。景隆狼狽走。十二月。取廣昌。是歲。右府都督僉事袁義卒。義廬州廬江人。嘗征雲南有功。徵還。陞今官。尋卒。賜葬祭。建省躬殿。至是成。殿在乾清坤寧二宮之間。爲退朝燕處所居。置古書聖訓於其中。以尙父所言升書之旨。夏書所歌聲色宮室之戒。命

方孝孺爲銘。遼王來朝。三十三年。革除建文二年春正月。詔更定官制。以順成爲都督同知。靖難師取蔚州。攻圍大同。二月。梁國公胡顯有罪。革爵。安置臨襄。交通楚王故也。甲子。詔更都察院爲御史府。定御史二十八員。舊制都察院與刑部分治刑獄。以行寬政。斷獄頗簡。遂更名。如漢制。專以糾貪殘。舉賢良。匡政事。宣教化。爲職。省御史員二十八人。務爲忠厚。以底治平。三月戊辰。賜御史衣。己巳。改詹事府公署爲御史府。賜宴于新治。改都御史練子寧等御史大夫。置左右補闕。左右拾遺。以諸刑官及御史之省員者爲之。又增六部侍中員。次尙書。詔增王府侍讀員。凡王府置賓輔一人。侍書一人。進對皆稱名而不臣。坐論道德。王待以客禮。賜禮部進士胡廣等一百一十人及第出身有差。廣對册有親藩陸梁。人心不搖等語。上親擢爲第一。而賜名靖。四月。李景隆收潰卒。號百萬。及靖難師戰于白溝河。景隆大敗。退保濟南。時都指揮平安軍亦敗。五月。靖難師圍濟南。至于七月。不克乃去。以山東參政鐵鉉有卻敵功。命翰林檢討陳某。齎銀幣賞之。吏部主事魯某。齎命。封鉉三代。鉉入謝。拜布政使。以歷城侯盛庸代李景隆爲征虜大將軍。陞鐵鉉爲兵部尙書。副之。十月。靖難師破滄州。大將徐凱被執。遂進攻東昌。十二月。盛庸救東昌。靖難師戰。互有勝負。靖難將張玉卒于陣。三十四年。革除建文三年春正月。元旦。擬命神寶成。告于天地太廟。爲文以示遠邇。先是。上在儲宮。嘗夢神人致上帝命。授以重寶。元年。得青玉于雪山。廣袤踰二尺。二年正月十一日。上將郊祀。乘輿出宿齋宮。其夕復若有覩於前夢協。遂命玉人琢爲大璽。方尺六寸九分。親定其文。曰。天命明德。表正萬方。精一執中。宇宙永昌。其歲十二月。工成。奏名曰。凝命神寶。至是告于上下神祇而藏之。東

呂奏捷。詔褒賞之。將士進官有差。二月。加禮部尙書陳迪太子少保。三月。諸將及靖難師戰于夾河。敗績。閏月。復戰于薊城。亦敗。順德大名彰德等郡皆下。陞顧成爲右都督。尋戰敗。降爲王用。盛庸平安等戰通州東昌。屢次以捷聞。詔將士人進一官。六月。靖難師攻濟寧。九月。翰林院修撰王良卒。良有文學。上甚重之。遣官諭祭。十月。靖難師克保定西水寨。十一月。戰楊村。靖難將李彬遁還北平。靖難將陳珪破楊村。三十五年。革除建文四年春正月。靖難師克東阿東平。遂破汶上諸寨。設伏淝河。敗平安兵十餘萬。已而進戰小河。諸將以捷聞。是戰也。靖難諸將還請旋師。獨朱能與王意合。遂整兵南下。靖難師克沛縣。知縣顏瓌死之。二月。以禮部右侍郎黃觀爲禮部左侍郎。遣募兵。四月。戰于泮隄齊眉山。皆敗。復大戰于靈璧縣。大敗。副總兵陳睢平安參將馬溥徐真及都指揮三十餘人皆被執。衆皆潰降。營寨無復有完者。五月。靖難師克泗州。渡淮。敗盛庸兵。遂克盱眙。下揚州。六月。文廟渡江。駐金川門。上闔宮自焚。遂出走。十二月。潭王及李景隆開門迎降。吏部尙書張紱。大理寺左少卿胡閏。戶科都給事中龔泰。衡府紀善周是修。死之。文廟入京師。相傳建文君已崩。羣臣勸進。命翰林侍講方孝孺草詔。孝孺不屈。死之。禮部右侍郎黃觀。翰林修撰王叔英。時募兵在外。聞京師已定。亦死之。文廟於是俯徇輿情。十七日。卽皇帝位。詔革除建文年號。仍稱洪武。復改故皇太子及妃。稱皇兄懿文皇太子。皇嫂懿敬皇太子妃。建文君及其子。皆廢爲建庶人。弟吳王爲吳庶人。尋執太常寺卿黃子澄。禮部尙書陳迪等責問。不屈。俱族誅之。刑部尙書鐵鉉等。猶主兵餉在外。圖爲抗禦。相繼械至。俱不屈死。或曰建文君之生也。頂顙頗偏。高皇帝知其必不終。嘗匣以髡緇之。

具戒之曰。必要大難。乃發此。至是遂爲僧以逃去。又曰。建文君幼穎。能爲詩。高皇帝使賦新月。曰。誰將玉指甲。點破碧天痕。影落江湖上。蛟龍不敢吞。帝曰。必免於難。後果如其言。正統末。自滇南歸京師。禁中以壽終。嘗賦詩云。影落江湖四十秋。蕭蕭華髮已盈頭。乾坤有恨家何在。江漢無情水自流。長樂宮中雲影散。朝元閣上雨聲愁。新蒲細柳年年綠。野老吞聲哭未休。士庶至今能道之。

謹按歷代君鑒云。初太祖封建諸子。以燕舊京。且近漠北。擇可以鎮服者。遂以封上。太祖嘗曰。異日安國家。必燕王也。建文君崩。上以諸王及文武羣臣之請。卽皇帝位。後有言建文所用之人。宜屏斥者。上曰。今之人才。皆皇考數十年所作養者。豈建文一二年間便能成就。又曰。雖仍其官。不宜置之要地。上曰。致治必資賢才。天生材以爲世用。隨器任用。共理天工。何必致疑。故建文諸臣如黃福、鄭賜、胡廣輩。或爲心腹。或官侍從。歸附之後。皆至顯庸。又嘗伏覩洪熙初年。御製大明神功聖德之碑。有曰。懿文太子薨。術者言燕地有天子氣。建文君嗣位。左右以望氣之言。屢進削奪之計。時諸王多以罪削。於是姦臣造誣飾詐言。皇考責過之書數下。王府羣臣惴惴。皇考諭之曰。省己不愆。奚恤外言哉。凡上章自白。姦臣皆匿不奏。而布置其黨於北平三司。繼調八府兵圍王城。護衛羣臣言事急矣。事當倖伏作機。上肉乎。旣而兵增三匝。衆忿出鬪。皇考不能止也。圍城兵稍卻。皇考泣曰。汝輩成吾罪矣。猶上章自白。冀朝廷之開悟也。又爲姦臣所格不達。而京師數十萬兵。奄薄城下。於是皇考誓天曰。臣不敢負朝廷。遂以護衛將士朝京師。且而陳姦臣之罪。請誅之。旣歸奉藩。時朝廷召四方兵皆至。道途所遇。倒戈迎降。皇考撫而散遣之。多願侍衛。

不去。既臨大江，江師具舟迎濟，守城親王開門豫待。皇考慮驚乘輿，駐金川門，遣人奉章言所以不得已來朝之故。姦臣蒼黃，知罪不宥，閉皇城門不內，而脅建文君自焚。皇考聞之大驚，發衆馳救，至已不及。皇考仰天慟哭曰：「臣之來也，固將清君側之惡，用寧邦家，何不痛耶！」遂備天子禮斂葬，釋親王囚，執姦臣數其罪，斬於市，告謝祖宗，將北歸。諸王及文武羣臣合辭上請：「今國家無主，願留以主宗社。」民皇考固讓弗獲，既乃卽大位。凡建文姦臣所削諸王封爵，所變亂洪武制度，所廢黜洪武臣僚，其非罪者，咸復之。中外文武之臣無改，大赦天下，改明年爲永樂元年。嗚呼！盛哉！聖人一怒如雷之奮，摧擊之下，雨澤普施，而萬物勃勃有生氣，故革除諸臣雖曰劉之，而其後則寬宥之，有歸心者，則又顯庸之。建文君雖曰追廢，然猶書其沒曰崩，當其在位，猶尊之曰朝廷，仁義並行，蓋有不相悖者。視夫陰陽闔闢，渾渾乎其無間也，嗚呼！帝之德至矣。

革除遺事節本卷二

闔宮傳

焚巢姤凶。奔走無所。慈宮長秋。遙山碧鍾。天潢玉葉。姬姜嬪御。孰死孰生。吁嗟一炬。

述闔宮傳第二

皇太子妃呂氏

皇太子妃呂氏。鳳陽壽州人。父本元帥府都事。歸太祖爲中書掾史。累官禮吏二部尚書。出爲都轉鹽運使。終太常寺卿。懿文皇太子始娶。開平忠武王常遇春女。洪武中薨。是爲懿敬皇太子妃。呂氏以選冊爲皇太子繼室。建文君卽位。尊爲皇太后。洪武三十五年六月。文廟駐金川門。闔宮自焚。或曰皇太后呂氏以焚崩。未有可考者。八月。頒詔書有云。又將呂太后之父呂本靈位。與太祖皇帝同祀於西宮。正指此也。

皇太孫妃馬氏

皇太孫妃馬氏。□□□□人。光祿少卿馬全女也。洪武二十八年十月癸卯。冊爲皇太孫妃。建文君卽位。備金冊金寶。冊爲皇后。壬午六月。上避靖難師。遂出奔。闔宮自焚。皇后馬氏存沒莫考。臨寧王允熙。懿文皇太子第四子也。懿文五子。長爲建文君。次長曰雄英。未成人而殤。洪武十五年。追封虞王。諡曰懷。次允燭。允燼。允熙。永樂二年三月二十七日。詔略曰。朕聞帝王之道。立愛惟親。爲子不祗。不及於父。懿文皇太

子降生弗永。允炆幼冲嗣位。顛覆舊章。戕害骨肉。社稷幾墜。賴天之佑。內難克清。允炆闔宮赴火。諸臣民同辭勸進。朕以宗社爲重。勉狗輿情。君臨大寶。長兄諸子。允熲、允煙、仍錫王封。不意允熲、允煙弗知省躬。自生疑懟。朕以長兄至情。不忍譴責。免爲庶人。以保全之。朕痛切于心。常存念慮。長兄未承嗣。其第四子允熙。生有十四年矣。器資端重。改封顯寧王。世守懿文皇太子之祀。於戲。協和之道。睦族爲先。惇敘之仁。繼嗣爲大。庸展同氣之情。庶續親親之義。布告天下。咸使聞知。然允熙尙童。未及遣之國。恆侍禁中。

皇曾孫文奎

皇曾孫文奎。建文君長子也。以洪武二十九年十月甲寅生。革除初年。羣臣請立儲貳。優詔不許。已而冊爲皇太子。壬午六月。闔宮赴火。文奎時年七歲。其存沒莫考。文奎之弟文圭。年二歲。廢爲建庶人。

江都郡主

江都郡主。懿文皇太子長女也。洪武二十七年十二月辛卯。以前軍都督僉事耿璠爲宗人府儀賓。尙皇孫女江都郡主。建文君卽位。進長公主。璠爲駙馬都尉。皆莫知其所終。

謹按天順元年十月二十六日勅諭文武羣臣曰。朕恭膺天命。復承祖宗大統。夙夜憂勤。欲使天下羣生。咸得其所。而況宗室至親也哉。念建庶人等。自幼爲前人所累。拘幽至今已五十餘年。憫此遺孤。特從寬貸。用是厚加賞賚。遣人送至鳳陽居住。月給廩餼。以安其生。仍聽婚姻。以續其後。庶副眷念親親之意。故諭少保李賢曰。上復位之後。因思建庶人輩。淹禁將五六十年。意欲寬之。一日謂賢曰。親親之義。實所不

忍賢對曰。陛下此一念。天地鬼神實臨之。太祖在天之靈實臨之。堯舜存心。不過如此。上遂決。即日白太后許之。左右或以爲不可。曰。有天命者。任自爲之。左右聞之。皆愧服不能止。乃遣中官於鳳陽造房屋畢。日上召賢曰。今可送去。勅軍衛有司供給柴米。凡一應器用。悉令完具。聽其婚娶。自在出入。給與閹者二十人。婢妾十數人。遣太監牛玉入禁諭其意。建庶人聞之。且喜。不意聖恩若此。時庶人年五十六七。吳庶人已沒。尙有庶母嫫老婦五六人。有年八十以上者。庶人入禁時。方二歲。出見牛馬亦不識。上召賢謂可發旨意。賢謂此非細事。宜諭文武百官。上曰。然。次日宣畢。人人感嘆。以爲眞帝王美事。旣而又有淺見者。以利害之事阻之。

革除遺事節本卷三

列傳

敷展謨猷。式遏亂略。必有君子。而後能國。革除之臣。遐福者稀。廣哀搜集。昭隱闕微。

述列傳第三

董倫

董倫字安常。本東昌恩縣人。世居燕之宛平。自爲儒生。處山林間。布褐藜藿。已懷憂世之志。學者多從之。遊以所居具川。因稱爲具川先生。元末徵辟不出。國初擢用單縣儒士張寧。洪武十五年寧以倫薦遣使徵之。以爲春坊贊善大夫。賜冠帶。事懿文皇太子。其所陳說多忠厚之言。太祖皇帝聞而善之。十八年正月由右春坊右贊善陞春坊大學士。賜文綺六疋。鈔五十錠。會東宮晏駕。二十五年出爲河南左參議。在任盡民事。名其退食思政之堂曰後樂。方孝孺爲之記。嘗草封事數千言。無一不愜上心者。二十六年上書薦肇州吏目諸葛伯衡。上命擢爲陝西右參議。三十年以誤坐免。典教滇南。東宮憐而老之。賜以白金。若干錠。倫行之成。都蜀獻王深寵之。留連彌月。恩禮有加。賦詩八章以道行。至滇。凡作養成。就用夏變夷。漸靡皆出於仁義道德。故雖蠻夷野蠻。皆知向方。洪武三十一年後五月。建文君卽位。眷念東宮舊臣。屢詢及之。左右多言倫可。卽召至京師。慰勞備至。拜嘉議大夫。禮部侍郎。兼翰林院學士。與方孝孺皆入內

開侍經筵。是年七月十三日。賜御書怡老堂三大字。及髥几玉鳩杖各一。倫上表稱謝。初監察御史解縉。嘗代夏長文作劾袁泰疏。泰銜之。被泰誣斥。太祖令縉十年著述。始許擢用。未及期。會太祖賓天。縉遽赴臨。權臣謂赴臨非詔旨。遂謫河州。縉與倫書祈哀。歲餘。權臣黜倫之言。上召縉還。以爲翰林待詔。其拳拳汲引此類也。倫爲人質直敦厚。有文學。爲時所重。濟時匡君之念。老而益篤。其卒也不可考。蓋在革除年間云。

沐春

沐春。字景春。鳳陽定遠人。黔寧王沐英長子也。生末期。母歿。鞠於外氏。長歸就學。年十七。卽侍英征西番。明年。從征□□。乃俱擒其渠魁。又明年。從征雲南。立功先士卒。癸亥。還京師。遂掌禁旅。冬。江西寇僭號順天王。扇諸郡作亂。春與征奮勇先登。殲之。乙丑秋。授驃騎將軍。僉後軍都督府事。廷請試職。上曰。是兒我家。人非他比也。畀實授。春剖決如流。嘗錄囚于烈山。審逆黨于蔚州。奏釋各數百人。王申。英薨于雲南。春往奔喪。歸葬。英襲爵西平侯。鎮雲南。一遵父道。謂屯田爲政要務。歲較多寡。嚴賞罰。勸功乃倍。饋餉以足。已而緬甸輒東川夷。相繼作難。春命將授成算。遂皆殄平。甲戌春。復平越雋番寇。越州蠻阿資者。先年倡亂。朝廷費數萬之師。往往無功。春又平之。麓川宣慰思倫發爲其下所圖。戊寅四月。破刀幹孟諸砦。誅其罪首。而釋其餘衆。自是百蠻震懼。不復攜貳。功授征虜前將軍。盡平其地。九月十二日。春薨。年三十六。革除君震悼加厚賻焉。語在君紀。春沉毅果敢。明識絕倫。在鎮七年。開田至三十萬餘畝。復民戶五千餘。又

嘗鑿鐵池河。灌溉田數萬畝。民受其利云。

王紳

王紳字仲縉。金華義烏人。父禕。以文行重海內。與宋濂齊名。國初擢儒臺校理。歷起居。出判南康。臨漳二郡。會修元史。召爲總裁官。尋推翰林待制。使雲南。仗節死。時紳年甫十三。聰敏過人。落筆爲文。沛然不可禦。鞠于伯氏。綬事母何盡孝。及卒。哀毀踰禮。未幾。綬亦歿。紳獨綜理生業。兢兢憂患中。而傑然負奇志。暇日。益取經史百氏言。窮其旨歸。縱橫磅礴。出入上下。宋濂一見。卽器之。曰。王華川其有後乎。一時俊傑。多自服不逮。洪武二十五年。蜀獻王聞其賢。馳書幣聘致。待以客禮。傳教授蜀郡。紳痛父遺幣未返。邱壠白其情事。王憫之。給道里費以行。至雲南。訪求不獲。遂卽死所。莫祭。仰天號慟幾絕。過者爲之泣下。露襟。遽滇南慟哭記以著志。雲南布政張統尤重之。作弔王翰林文紆其情。旣還。王慰勞備至。蜀人無貴賤。咸知敬愛。建文君卽位。召爲國子博士。遂入詞垣。編摩太祖實錄。與侯城方孝孺交遊。嘗尊孝孺爲百代儒宗。勸之著書。以淑來世。孝孺不以爲然。紳自是益嚮道德。而略文藝。嘗以其父死節事聞于朝。得旨。贈翰林院學士。謚文節。開國以來。文臣有謚者。定自禕始。庚辰十二月丙午。紳卒。年四十有一。有繼志齋集三十卷。藏于家。子祿。積學能文。有祖父風。嘗受學于方門。購輯侯城集。遺之以傳。世稱之。

王艮

王艮字敬止。吉安吉水人。革除己卯。首江西解額。明年。廷試當第一。將傳臚。以貌不及胡廣。遂以廣易之。